

UDHËZIM
Nr. 2, datë 1.6.2017

**PËR MIRATIMIN E PROCEDURAVE DHE KRITEREVE PËR PËRZGJEDHJEN
DHE EMËRIMIN E EKSPERTËVE FINANCIARË**

Komisioni Qendror i Zgjedhjeve, në mbështetje të nenit 21, pika 1, neni 23, pika 1, germa “b”, nenit 24/4 të ligjit nr. 8580, datë 17.2.2000, “Për partitë politike” i ndryshuar me ligjin nr. 90/2017 “Për disa shtesa dhe ndryshime në ligjin nr. 8580, datë 17.2.2000, “Për partitë politike”, të ndryshuar”,

UDHËZON

PJESA I
TË PËRGJITHSHME

Neni 1
Qëllimi

Ky udhëzim ka për qëllim të përcaktojë procedurat dhe kriteret e përzgjedhjes së listës paraprake dhe emërimit të ekspertëve financiarë për monitorimin në mënyrë ligjore, të paanshme, transparente dhe profesionale të fushatës zgjedhore në përputhje me kreun II, pjesa II, të Kodit Zgjedhor të Republikës së Shqipërisë, ligjit nr. 8580, datë 17.2.2000, “Për partitë politike” i ndryshuar me ligjin nr. 90/2017, dhe standardet ndërkombëtare të kontabilitetit të parashikuara në ligjin për kontabilitetin dhe pasqyrat financiare.

Neni 2
Parime të përgjithshme

1. Ekspertët financiarë që emërohen për monitorimin e fushatës zgjedhore duhet të disponojnë njohuri të certifikuara në fushën e auditimit financiar dhe të kenë eksperiencë profesionale në fushën e ekspertizës së llogarive si dhe të disponojnë referenca që dëshmojnë profesionalizimin dhe paanësinë.

2. Monitorimi nga ekspertët financiarë bëhet në emër dhe për llogari të KQZ-së dhe synon vlerësimin për shkallën e përputhshmërisë së veprimtarisë së subjekteve zgjedhore me kushtet dhe kërkesat e Kodit Zgjedhor dhe të ligjit nr. 8580, datë 17.2.2000, “Për partitë politike” i ndryshuar me ligjin nr. 90/2017, për financimin dhe raportimin e shpenzimeve të fondit financiar, përfituar nga partia politike gjatë fushatës. Monitorimi i fushatës zgjedhore bëhet me anë të vëzhgimit dhe grumbullimit të informacionit për veprimtari të përzgjedhura statistikisht.

3. Përzgjedhja dhe emërimi i ekspertëve financiarë bëhet në bazë të parimit të konkurrencës së lirë dhe të barabartë dhe garancisë për mungesën e konfliktit të interesave.

4. Shpërblimi për veprimtarinë e monitorimit bëhet sipas tarifave të përcaktuara në kontratën e shërbimit sipas kontratës tip të miratuar me vendim të KQZ-së dhe orientohet nga tarifat e tregut.

Neni 3
Kërkesa të veçanta

Ekspertët financiarë të emëruar sipas këtij udhëzimi duhet të monitorojnë në mënyrë specifike:

- a) Zbatimin e dispozitave ndaluese për financimin e fushatave të përcaktuara në Kodin Zgjedhor dhe në ligjin nr. 8580, datë 17.2.2000, “Për partitë politike” i ndryshuar me ligjin nr. 90/2017;
- b) Dokumentimin e shpenzimeve të subjekteve të treta në funksion të veprimtarive të fushatës së

subjektit zgjedhor;

c) Respektimin e kufirit maksimal të shpenzimeve dhe të kufizimeve sipas llojit, sidomos për sa i përket materialeve propagandistike dhe reklamave televizive;

d) Kostimin e veprimtarive të monitoruara me qëllim krahasimin e mëvonshëm me shpenzimet e deklaruar nga subjekti zgjedhor gjatë raportimit;

e) Rregullat e brendshme të subjektit elektoral për raportimin e shpenzimeve;

f) Transaksionet financiare të kryera për periudhën 3 muaj përpara dhe pas ditës së zgjedhjeve, nga persona fizikë ose juridikë, vendas ose të huaj, me qëllim evidentimin e transaksioneve të pajustificuara dhe që mund të jenë përdorur për financim të paligjshëm të fushatës zgjedhore të një ose disa partive politike.

Neni 4

Aplikimi

1. KQZ-ja, jo më vonë se 60 ditë para datës së zgjedhjeve, publikon njoftimin për aplikimin e personave të interesuar për emërimin si ekspert financiar për monitorimin e pasqyrimit të fushatës zgjedhore.

2. Të interesuarit, përveç kushteve të përgjithshme të parashikuara nga legjislacioni që rregullon organizimin dhe funksionimin e ekspertëve financiarë, duhet të paraqesin pranë KQZ-së dhe dokumentacionin, si më poshtë:

a) Kërkesën për t'u përfshirë në procesin e monitorimit;

b) Dëshmitë që provojnë aftësimin profesional, përfshirë dëshmitë e kualifikimit dhe licencat apo autorizimet për ushtrimin e profesionit;

c) Referenca të punëve të mëparshme profesionale;

d) Kopje të dokumentit të identifikimit;

e) Deklaratë vetjake nëse është në kushtet e konfliktit me ndonjë nga subjektet zgjedhore që do të monitorohen, sipas parashikimeve të ligjit nr. 9367, datë 7.4.2005, "**Për parandalimin e konfliktit të interesave në ushtrimin e funksioneve publike**", i ndryshuar.

Neni 5

Verifikimi paraprak

1. KQZ-ja, brenda 5 ditëve nga përfundimi i afatit të aplikimit, sipas neni 4 të këtij udhëzimi, në bazë të dokumentacionit të depozituar, mund të bëjë seleksionimin paraprak të aplikantëve nëse konstaton se aplikantë të veçantë ndodhen në kushtet e konfliktit të interesit, që cenojnë integritetin e monitorimit, nuk japin referenca të mjaftueshme që të dëshmojnë profesionalizëm dhe paanësi, ose nuk u janë përgjigjur në mënyrë të kënaqshme zbatimit të kontratave të mëparshme me KQZ-në.

2. Kundër vendimit të KQZ-së, për miratimin e listës paraprake, personat e skualifikuar nga lista e përzgjedhur mund të ankimohen në KQZ jo më vonë se 50 ditë para datës së zgjedhjeve.

3. KQZ-ja miraton listën e personave të cilët do të marrin pjesë në shortin për emërimin si ekspertë financiarë, të cilët do të monitorojnë fushatën zgjedhore, jo më vonë se 45 ditë para datës së zgjedhjeve.

Neni 6

Procedura e emërimit

1. KQZ-ja përcakton përpara hedhjes së shortit termat e referencës së kontratës tip dhe tarifën e shpërblimit që do të zbatohet për çdo kontratë.

2. KQZ-ja përzgjedh me short dhe emëron së paku një monitorues për çdo subjekt zgjedhor.

3. Si rregull, shorti hidhet jo më vonë se 10 ditë përpara fillimit të periudhës së monitorimit.

4. Aplikantët kanë të drejtë të jenë të pranishëm në mbledhjen e KQZ-së për hedhjen e shortit. Në rast se janë të pranishëm në hedhjen e shortit, atyre u kërkohet të deklarojnë menjëherë nëse e pranojnë emërimin. Në rast se refuzojnë, përjashtohen nga procedura e mëtejshme e shortit.

5. Vendimi për emërimin, në të cilin përcaktohet dhe afati për dorëzimin e raportit të monitorimit në KQZ, merret jo më vonë se 24 orë nga hedhja e shortit.

Neni 7

Organizimi i shortit

1. Në një enë transparente futen aq gogla sa është edhe numri i ekspertëve pjesëmarrës në short.

2. Në secilën prej goglave futet nga një shirit letër, ku shënohet emri i ekspertit kontabël pjesëmarrës në short.

3. Përfaqësuesit e subjekteve zgjedhore do të tërheqin secili me radhë një gogël nga ena. Përfaqësuesi i subjektit zgjedhor do të hapë goglën dhe do të lexojë emrin e ekspertit financiar që është shënuar në të. Eksperti financiar, emri i të cilit do të jetë shënuar në shiritin e letrës, do të jetë eksperti i cili do të monitorojë fushatën zgjedhore të subjektit zgjedhor që tërheq goglën. Rasti mbahet shënim nga Sekretari i Përgjithshëm i KQZ-së.

4. Në rast se përfaqësuesi i subjektit zgjedhor nuk është i pranishëm, KQZ-ja cakton një përfaqësues nga stafi për tërheqjen e shortit.

5. Radha e tërheqjes së goglave nga përfaqësuesit e subjekteve zgjedhore përcaktohet me parashort, i cili zhvillohet sipas kësaj procedure:

a) Në një enë tjetër transparente futen aq gogla sa është edhe numri i subjekteve zgjedhore që do të auditohen.

b) Në secilën prej goglave futet një shirit letre, ku shënohet emri i një prej subjekteve zgjedhore që do të auditohet.

c) KQZ-ja cakton një person nga stafi për të tërhequr goglat.

d) Personi i caktuar nga stafi i KQZ-së tërheq një gogël, e hap dhe lexon emrin e subjektit zgjedhor që është shënuar në shiritin brenda goglës dhe ia jep sekretarit të KQZ-së.

e) Përfaqësuesi i subjektit zgjedhor që është shënuar në shiritin e letrës brenda goglës së parë do të jetë i pari që do të tërheqë në shortin që do të zhvillohet sipas procedurës së përcaktuar në nenin 8, pikat 1, 2 dhe 3, kështu do të vazhdohet deri në tërheqjen e të gjitha goglave brenda në enë.

Neni 8

KQZ-ja në çdo rast miraton me vendim rezultatin e shortit.

Neni 9

Ku udhëzim hyn në fuqi menjëherë.

KRYETARI
Klement Zguri